

## Tiada kewajipan letak batu nisan

**Kuala Lumpur:** Tiada kewajipan untuk meletakkan batu nisan dan ia hanya sekadar penanda aras bagi menandakan itu adalah kubur.

Pensyarah Kanan, Universiti Putra Malaysia (UPM), Dr Mohammad Nidzam Abdul Kadir berkata, ia turut bertindak sebagai penanda aras bagi memberitahu pemilik kubur itu.

“Kalau kita letak batu biasa pun sudah memadai dan cukup sekadar diletakkan di bahagian kepala dan juga kaki. Nama pun tak perlu berikutan tiada kewajipan.

“Bagaimanapun, Islam melarang sekiranya mereka membelanjakan sejumlah wang yang besar bagi batu nisan sehingga berlaku pembaziran,” katanya.

Menurut beliau, tidak digalakkan penggunaan sebarang kalimah Allah pada batu nisan.

“Kita bimbang sekiranya ada orang terpijak atau terlangkah sebab kadang-kadang batu nisan ini dicabut untuk tujuan tertentu.

“Jadi saya lebih cenderung supaya orang tidak tulis. Sekiranya nak tulis al-Fatihah boleh, namun bukan seluruh ayat daripada surah itu,” katanya.

Dalam pada itu, Mohammad Nidzam menjelaskan, tiada larangan bagi orang bukan Islam menjalankan perusahan batu nisan termasuk



**Islam melarang sekiranya mereka membelanjakan sejumlah wang yang besar bagi batu nisan sehingga berlakunya pembaziran”**

**Dr Mohammad Nidzam**

keranda untuk orang beragama Islam.

Katanya lagi, kubur adalah tempat untuk orang Islam supaya sentiasa ingat pada hari akhirat.

“Jadi kita tidak perlu menghiaskan kubur sehingga macam nak memuja. Sekiranya ia kelihatan seperti ritual (upacara) memang wajib untuk dielakkan.

“Sebaiknya, kubur itu berada dalam keadaan biasa dan ziarah hanya sekadar mengingat pada hari kematian selain berdoa kepada Allah supaya mengampunkan dosa si mati,” katanya.